

[Wittenberg], [um 2. August 1544]

Von Philipp Melanchthon

Druck: Isocrates, Basel 1548, II, Sp. 162f. (Auszug).
Nicht in MBW.

Francofordiae uidi picturam puellae texentis coronam è floribus, Je lenger ie lieber, cum hac inscriptione,

Je lenger ie lieber ich bin allein/
Denn trew vnd warheit ist worden klein.

Significat se nunc delectari solitudine, etsi haec initio fuerit molesta. Florem uocant uulgo Amarum dulce, Graecis Teucrion est. Ego ad picturam hos uersus addidi:

Virgo procul turbam fugitans ego texo coronam,
Et flos ut uincam taedia longa monet.

Nomen enim γλυκύπικρον habet: fuit ante molestum,
Quod fruerer nullis ipsa sodalitijs.

Nunc haec uita mihi grato fit dulcior usu,
Quae uelut in portu nulla pericla timet.

Et florem aspiciens saepe haec praecepta recordor,
Quae fiunt usu cognita grata magis.

Faeceris haud quicquam, nisi quod faecisse necesse est:
Quamque dedit, norma est una sequenda, Deus.

Et fugito turbam, nisi cum respublica poscet,
Congressus, facies hos tamen ipse breues.

Nec tibi curabis multos adiungere amicos:
Rara haec sunt, candor, gratia iusta, fides.

At si quos poteris reque officioque iuuato,
Sic tamen adiutos ne meminisse putes.

Praecipue uerò remis uelisque potentum
Fucosas fugito cautus amicitias.

Ac ut Sirenas sapiens uitauit Vlysses,
Illecebris aulae ne capiare caue.

Talis uita Deo grata est: et libera stultis
Curis, accedit culmina celsa poli.